



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma : Tir Yimyim

tirymyim@aolima



tir yimyim

TAPAK 10

Raijor Dal president Akhil Gogoi-i
Sivasagar nungi tokteptsü

Mithali Raj-i alizüng
tasen ka tongtet

VOL. XVIII NO. 147 (ADOK 147) DIMAPUR

KÜPTOKNÜ (SATURDAY)

METSÜREMI (MARCH) 13, 2021

₹ 5.00

COVID-19 Nagaland: Nisung 4 dak putet

Kohima, March 12 (TYO): Hokolbarnü Nagaland nung nisung 4 dak COVID-19 aliba putet aser parnok züngsema nisung ajak agi 12,221 kümogo. "Tanü nisung 4 dak COVID-19 aliba putet. Parnokji Mokokchung aser Kohima nung anana lir. Ano, Kohima nung nisung 3 taneptsü angu" ta Health & family Welfare Minister, S Pangnyu Phom-i ashi. "Nisung 12,221 nungi 11,966 taneptsü nguogo aser tang parnok 10 anepaludar. Nagaland nung taneptsü angubaji 97.91% lir," ta Health & Family Welfare Director, Dr

Denis Hangsing-ia metetdaksü. "Nagaland nung COVID-19 puteter nisung 91 süogo saka parnok 10 bo tanga timtem ajanga asü. Külen nisung 154 tashi tanga state temi ogo" ta paisa ashi. Tang nisung 10 anepaluba rongnung Kohima nung 9 aser Mokokchung nung ka lir, ta paisa shisem. "Nagaland nung COVID-19 alitsü akok ta temolung melemi bilemba sample 1,33,437 tendangogo. RT-PCR ajanga sample 75,215, TrueNat ajanga 37,474 aser Rapid Antigen Test ajanga 20,748 tendang" ta Dr Hangsing-isa metetdaksü.

RIIN tenzüksü takhangba agüja lungkak aittsü

Dimapur, March 12 (TYO): March 12, 2021 nü Joint Committee on Prevention of Illegal Immigrants (JCPI)-i Dimapur nung kin teloktem aser civil society teloktem den senden ka amendang state sorkar dang RIIN mapa tenzükang ta takhangba agüka ozüngi melaba ama lungkak aittsü telemtetba agiogo. Senden nung March 15, 2020 nü Chief Minister nem Ultimatum agütsüba benoka jembi. Iba shidi nung RIIN aser ILP nung cut-off-year 1-12-1963 latettsü atema takhangba agütsü. Ajisüaka, 2020 nung wara ajuruba ajanga iba mapa meinyaktet. JCPI-isa Chief Minister dang tawa Nagaland Assembly nung

Banuo'er Commission-i benokba RIIN agizüksü atema shidi ka zülü saka ibaji meinyak. Tanü senden nung adenertemi Nagaland sorkar dang March 31, 2021 tashi nungbo tangsa Commission indang report agizüksü aser RIIN mapa inyaksü atema ozüng ka yanglutsü ashtsü telemtetba agi. Senden nung adenertemisa March 19, 2021 nü kin hohotemi pei pei telongtet nung timi lungkak aitba sentong ka agitsü aser idangji pei pei Deputy Commissioner ajanga sorkar nem tezüluba agütsütsü lemtet. Kin hohotemi pei dak apet lungkak aitba sentong ayonga agitsü lemtet.

Myanmar nung lungkak aiter 10 khaset

Mandalay, March 12 (Agencies): Myanmar nung sepaitemi yashi lungkak aiter nisung 10 shi tepsetogo. Myaing nung nisung 6 aser Yangon, Mandalay, Bago aser Taungoo nung nisung kaka khaset ta osang angazüker. Mitkartemi Aung San Suu Kyi anema ken o tasen ka benokogo aser ibaji 2017-18 tsüngda political party kati la nem USD 600,000 aser gold bars agütsüba lir. United Nations security council-i Myanmar nung sepaitemi timi lungkak aitertem dak tashiyim mapa inyakba aitsüba aser tashiyim mapa meinyaksü mepishiba sülen ghonda ishika dang lir mitkartemi Suu Kyi anema ken o tasenji benok. Taoba Yangon Division chief minister Phyo Min Thein-i Suu Kyi nem sen aser hon agütsüba nangzükogo ta mitkar atema otongdar Brigadier General Zaw Min Tun-i ashi saka pai indang kuli kecha magütsü. "Onoki aiben item kulitem jangjaogo aser tang anti-corruption committee-i bushisüngdang südar" ta Zaw Min Tun-isa metetdaksü. **Manipur sorkari Myanmar refugee yaritsü**

Imphal, March 12 (Agencies): Manipur state sorkari Myanmar nungi refugee tem atema school anepalutsütsü aser iba atema Ministry of Home Affairs (MHA) nungi tetuyuba atar, ta Chief Minister N. Biren Singh-i metetdaksü. Myanmar nungi nisung aika Manipur arrtsü ajanga India telungi miima aittsü meranger saka sepaitem ngur meyipa aoer, ta Biren Singh-isa ashi. "Ni Home Minister Amit Shah dang onoki kechi inyaksü'ar mepishia asüngdangogo. Kü atemabo iba ya humanitarian tebilemstü ka lir, saka India o Myanmar tsüngda tebilemstü onük ka asünung ni Centre den jembitsüsa akümer" ta paisa ashi. "Onoki arrtsü anükertem nem osang sangoktsüogo aser security forces talila mapa lemozüksüogo. Arrtsü adena nisungtem aruba osang mali saka onoki nisungtem arutsü imlar. Onoki civilian ajak jenokdaksütsü atema renema lir" ta Manipur CM-isa metetdaksü. Taoba mapang Mizoram Chief Minister Zoramthanga-ia Myanmar nungi refugee tem nem chiyungtsü aser tanenzükdak agütsütsü nangzükogo.

CM Neiphiu Rio-i 'Azadi Ka Amrut Mahotsav' tenzüksü



March 12, 2021 nü Secretariat Plaza, Kohima nung Nagaland Chief Minister Neiphiu Rio, NLA Speaker Sharingain Longkumer aser Home Commissioner, Abhijit Sinha, IAS nungertemi Dandi March jilu ia shilem agiba kaketshirtem den külemi tangokba noksa angur. (Kohima, March 12)

Dimapur, March 12 (TYO): March 12, 2021 nü Nagaland Civil Secretariat Plaza, Kohima nung 'Azadi Ka Amrut Mahotsav' sentong ayonga agiogo. Iba sentong ya India nüjiso ngur küm 75 abensaba nüngtem nung ayonga linük ajungalen agir. Tanü Principal Secretary, Home, Abhijit Sinha-i High School Junction nungi Civil Secretariat Plaza tashi jajaba sentong tenzüksü. Iba sentong

nung Kohima nung aliba school aser college nungi kaketshirtemi shilem agia liasü. "India nüjiso ngur küm 75 abensabaji August 15, 2022 nungang amongtsü saka March 12 nungi tenzüker, kechiyong Independence Day atongtsü atema hopta 75 lir" ta Chief Minister Neiphiu Rio-i ashi. March 12 ya nüjiso mapa inyakba nunga tongtipang anogo ka lir kechiyong 1930 nung Linük Tebu Mahatma Gandhi-i

Sabarmati Ashram, Ahmedabad nungi Dandi tashi Dandi March tenzük. Iba ya British sorkari salt tax nung onük aika benokba anema jajaba liasü, ta CM Rio-i metetdaksü. Prime Minister, Narendra Modi-i tanü Dandi March jilu ia sentong ka tenzüksütsü atema Ahmedabad nung lir, ta paisa ashi. "India nüjiso anguba sülen tayongzükba aika ajuruogo. **(Maneni tapak 2 nung...)**

Nagaland nung COVID tenokdangba aika agiener; Primary school lapoktsü melar

Kohima, March 12 (TYO): Nagaland nung COVID-19 agi shirangertem aika taneptsü anguba nung ajemdaker state sorkari tenokdangba kar salatsütsü telemtetba agiogo. Yashi Chief Minister Neiphiu Rio menden ser High Powered Committee (HPC) on COVID-19 senden ka amendang primary school (Class 1 nungi 5) tashi lapoktsü molunga agizükogo. COVID-19 wara agi atongba sülen March 2020 nungi shibangba sülen primary school lapoktsü, Class 6 nungi temaba class tembo February 8, 2021 nungi lapokogo. Primary school lapoktsüba

osangji HPC Spokesperson aser Planning & Coordination, Land Revenue and Parliamentary Affairs Minister, Neiba Kronu-i metetdaksü. School lapoktsü anogo ano melemtet saka School Education Department-i taruba anogo 10 tsüngda Health & Family Welfare Department den asüngdangtepa SOP yanglutsü, ta Minister Kronu-i ashi. HPC-i taoba mapang sorkar office tem ajunga lapokogo anungji sorkar office tembo akhi ama dang inyaka aotsü. State sorkarisa theatres, public places, exhibitions, cinema halls aser sports complexes lapoktsü

melaogo, ta paisa shisem. HPC-i commercial transport vehicles nung nisung tamentsüpur ajak amentsü aser akhi ama para agitsü temelaba agütsüogo, ta Minister Kronu-isa metetdaksü. HPC-isa tangalen nungi arur tourist dena nisungtem quarantine asütsü telemtetba agiba meyipa agiogo. Temang nung timtem alirtem dang medical check-up aser screening asütsü, ta paisa shisem. State sorkar tenokdangbatem salatsüyonga nisung ajaki COVID-19 tetuyubatem sülen anidaktsü metetdaksür, ta Minister Kronu-isa ashi.

Governor R. N. Ravi-i NHIDCL mapatongtem osang metetpela

Dimapur, March 12 (TYO): March 12, 2021 nü Nagaland Governor R. N. Ravi-i Mon, Tuensang, Longleng aser Mokokchung district tem nung NHIDCL-i inyakba gari lenmang mapatongtem meyipa reprangshi. Tanü Longleng Deputy Commissioner indang Office nung pai ketdangsürtem den senden amen. NHIDCL-i Merangkong-

Tamlu-Mon (86.84 Km) aser 2-lane Changtongya-Longleng (33.43 Km) yanglur. NHIDCL-isa Mokokchung-Tuensang (95.0 Km) aser Mokokchung-Mariani (63.0 Km) indang Maintenance aser Repair works inyaker. Temalen shia aliba 2-lane road anaji 2022 tatemlen aser Maintenance o Repair maparenji taruba ita 10 tsüngda tembangtsü

mapang lateta lir. Tanü senden nung gari lenmangtem yangluba nung tetsükdaksü aliba onük kar benoka angatettepogo. "Gari lenmang balala indang mapa junga inyakdar saka Tamlu-Namsang aser Wakching-Mon maparen kanga meilongi inyakba atema süoki ia bilemer" ta tanü Governor Ravi-i ashi. **(Maneni tapak 2 nung...)**

Tesem ana nung mi agi ki ana rongdok



Kusong Village, Noklak aser Oukshok Village, Longleng nung mibener temi mi remsepba mapang tangokba noksa ka yangi angur.

Dimapur, Metsüremi/March 12 (TYO): Noklak district kübok Kusong yimtsüing nung kitsük kironng lendong ataloka lir ta March 11, 2021 anepdang 10:33 ako nung osang ka arua liasü. Iba osang angashiba sülen Fire Station, Tuensang nung alirtem mi ya remseptsü ao. Mibener den hadir tabensa bener oa iba mi ya minute 40 shi nung remsepteta liasü.

Iba kitsük-kironng lendong nung ki ka rongdok aser sen lakh 5 shi jenjang osettsüset samaa liasü.

Mapang shidak nung mibener tonga arua mi

remsepba ajanga temeket nung aliba ki nung jangruloktsü aliba nungi kumzüktet. Iba lendong nung asü-ama meliasü aser mi adokba kuli monguteti lir. Iba mibener telok ya Duty Commander ASI Mziegwangteing lenisüba kübok oa liasü.

Maneni March 11, 2021 anogosa Longleng district kübok Oukshok yimtsüing nung kitsük-kironng lendong ataloka lir, ta nikongdang 2:00 ako nung osang ka aruba sülen Fire Station Longleng nungi Fire & Emergency Services team ka iba mi remseptsü asoshi ao.

Fire Tender ana den hadir aser Fire Personnel teperi oa iba mi remsepba ajanga temeket nung kaoloka aotsü aliba nungi kumzükteta liasü. Iba lendong nung ki ka rongdok aser sen lakh asem shi jenjang osettsüset rongdoka liasü.

Fire Team yagi minute 25 agia iba mi ya remsepteta liasü. Mi ya electrical short circuit nungi adok südi, ta temolung melema lir, kong nisung ka tera yirua liasü. Mibener tem ya Duty Commander SI C. Lamthai Khiamniungan aser ASI Wangkim Wangsa nati anir oa liasü.

District balala nung legal awareness sentong agi

Dimapur, Metsüremi/March 12 (TYO): India nunger nüjiso ngur küm 75 ajungba nungtem nung Nagaland State Legal Services Authority kübok District Legal Services Authorities ajanga "Bharat ka Amrut Mahotsav" omen nung ajemdaker March 12, 2021 nü Nagaland nung aliba district balala nung sentong balala ayongzüka agiogo.

Gari anirtem, talisa nüburtem senzüba garitem anir mem road safety awareness agüja, Kohima District Legal Services Authority ajanga Kohima jila nung "The Motor Vehicle Act 1988" indang pamphlets tem lema agüja liasü.

Iba mapang panel lawyer temi nisung 200 shi nem iba pamphlets ya agütsü.

Longleng nunga District Legal Services Authority ajanga Good Shepherd School Longleng nung sentong ka ayongzüik, kong CJM Longleng & Secretary Ajongba Imchen-i kaketshirtem ajungshia liasü.

Pai Fundamental Rights aser India senso ajunga teinyaktsütem, talisa linük yangluba nung kaketshirtem shilem indang onük nung jembia liasü.

Paisa district nung tang ochimashi mapa inyakbatem indang jembia aser itemji azüoktsü asoshi mera balala agitsü kaketshir nem angatetdakja liasü. Pai kaketshirtem dang loktiliba nung temelenshi ka asoshi Public Interest Litigation bener court-i arutsü ajungshi aser akokba lenmang ajak nung nüburtem yaritsü court renema lir, ta ashi. Pai kaketshirtem

dang ochishia alitsü ayongzüka liasü.

Kasa anogo Wokha District Legal Services Authority ajanga Rashtrabasha Prachar Samity, Wokha nung legal awareness sentong ka ayongzüka liasü.

Iba sentong nung Lichumo Kikon, PLV ajanga Bharat Ka Amrut Mahotsav indang jembia aser MA Lotha, Retainer Lawyer ajanga Legal Services & Legal Aid indang jembia liasü. Thungbeni Kikon, Case Worker (OSC) Wokha ajanga Gender Based Violence indang onük nung jembia.

Iba sentong ya Ajano Ngullie, PLV menden sür agia liasü.

Mon District Legal Services Authority ajanga Govt. High School 'C' Mon nung Legal Awareness Program ka ayongzüka liasü, kong N Mannon, Project Assistant DLSA ajanga iba sentong indang teratet ashi. M Moba, Retainer Lawyer ajanga Legal Services, iba inyakyim aser mapatem indang rasaa shia liasü. Paisa kaketshirtem dang pei temenden tali tejangjaba nung angazüka senso tajung ka asütsü ajungshia liasü. Iba sentong nung Tingkai Konyak menden liasü.

Peren District Legal Services Authority ajanga Dungki Government High School nung sentong ka ayongzüka Legal Service Authority indang inyakyim oshi balala nung zülua aliba pamphlet tem lema agütsü.

India nunger nüjiso ngur küm 75 ajungba bilemteta Tuensang District Legal Service Authority ajanga "Bharat ka Amrut Mahotsav" omen nung

ajemdaker St. Joseph's School Tuensang nung sentong ka ayongzüka liasü.

Iba sentong nung Kumdilong Kessen JMFC cum Secretary Tuensang DLSA ajanga "Bharat ka Amrut Mahotsav" anogomung indang rateta ashi aser cyber crime indang onük nung jembia kaketshirtem dang social media kanga shisa kaa amshitsü ayongzüik.

Iba sentong nung Soteth Anar, Project Assistant ajanga Child Labour aser Right to Education indang jembia aser Antimangyang Chang Retainer Lawyer ajanga tanurtem tim masüba inyaksangshi nungi kumzüka alitsü indang onük nung jembia kaketshirtem dang pei temeden meteta alitsü ayongzüik.

Dimapur District Legal Services Authority ajanga Namgalong Colony, Burma Camp nung Legal Awareness Programme ka ayongzüka liasü.

Iba sentong nung Somet C Chang, CJM & Secretary Dimapur DLSA ajanga sentong nükjidong rateta ashi aser Temjensoba, Panel Lawyer, DDLSA ajanga Prevention of Atrocities against SC/ST Act nung ajemdaker jembia liasü.

Kasa sentong nung Khumchuba Chang, Panel Lawyer, DDLSA ajanga legal rights, consumer rights, Domestic violence Act, RTI, Victim Compensation Schemes aser social welfare schemes balala indang jembia liasü.

Iba sentong nung Sangto Longchar, Project Assistant, Dimapur DLSA menden liasü aser sentong tembangba sülen sensaksem mapang agia liasü.

DMHSS ajanga Rose Jami nem tenüngsang agütsü

Dimapur, Metsüremi/March 12 (TYO): Nagaland Board of School Education ajanga agiba HSSLC Examination 2020 nung jenjang 8 buba angula, Rose Jami nem akhum agüja, Dimapur Mission Higher Secondary School ajanga March 12, 2021 nü Dimapur Ao Baptist Arogo, Town Fellowship nung sentong ka ayongzüka liasü.

Rose-i iba sentong nung jembiba mapang lai takok anguba atema Tsüngrem aser lar tsürabur nem tenüngsang agüja liasü. Iba jenjang tongtettsüsa la ajungmesor nema lai tenüngsang agüja liasü. Iba sentong nung lai sen 25,000 den kulikaket ka agizüka liasü.

School Governing Board züngsem, Dr. Jamedi Longkumer-i iba sentong nung jembiba mapang, "Nisung ajaki takum nung takok aginer, saka takok ya mela mela mangur. Maparen tatemi takok ya angur.

Nisung kati takok angutsü atema bendanga agüja aser nendaka sentong yanglutsüla, aser iba mapang timtem aser tamakok ajurutsü," ta ashi.

Pai ashiba agi, nükjidong ayuba ya kanga tongtipang lir, kechiaser nükjidong ayuba ajanga taküm nung takok aser tamakok ajurur. Pai kaketshirtem dang nükjidong yur takok angur kaka akumtsü ajungshia liasü.

School Governing Board Chairman, K Temjen Jamir-i school indang Governing Board aser arogopur tenüng nung jembiba mapang school nem tenüng tajung bener arutsüba atema Rose Jami nem tenüngsang agüja liasü.

Küm asem atonga iba school nungi toppers list nung kaketshir densemer, ta pai ashi.

Takok anguba kaketshir ya rongsen lir aser itemji ajanga lokti melenshitsütsü, ta paisa ashi.

CM Neiphiu Rio-i 'Azadi... (Tapak 1 nungi...)

Ajisüaka, kümtem süia arudang democratic maparen takangba kümdaktsüogo aser lokti o rongsenkettsüing tsütsü terenlok jenti bener arutetogo" ta CM Rio-isa metetdaksü.

India nüjiso anguba sülen Nagaland-i state aküm aser linük den külemi alizüngtem atongtsü atema meranga arur. Asenok education, human resources, road, power aser

health sector nung tajungba kümogo, ta paisa ashi.

"State sorkari Naga yimten latettsü atema meranger kechiyong iba ya asen maitsü aser putiotsü den sendaktepa lir. Linük Tebu Mahatma Gandhi-i yimjung, timi inyaktsü aser asüngteta alitsü sayubatem asenoki bilemtettsüla" ta CM Rio-isa metetdaksü.

Governor R. N. Ravi-i NHIDCL... (Tapak 1 nungi...)

Iba lenmang anaprong ya Contractor M/s Manaranjan Brahma ajanga inyaker aser Governor-i NHIDCL dang contractor merenshitsü atema ashi.

District balala nungi Deputy Commissioner tem den olemtepdang Zunheboto aser Tuensang nung gari lenmangtem yanglutsü aser yanglushitsü nüngdak ta asüba ajitet.

Iba onük ya Governor Ravi-i Ministry of Road Transport & Highway Union Minister dangi abentsü ta nangzüik.

Paisa Deputy Commissioner tem dang tang teinyakdak infrastructure nung temolung agütsütsü aser mapa jungjunga inyaktsü atema mapang shia

tenük yoktsü ashi.

Tanü Phom Peoples' Council-ia Governor RN Ravi den ajuruteper aser Longleng nung tziü peria mengui timtemba tebilemtsü lemsatet. Idanggi Governor-i iba asoshi mapa inyaktsü ta nangzüik.

Tanü Governor RN Ravi-i Bautung Government Higher Secondary School Longleng semdang aser Principal o tesayurtem dang kaketshirtemi High School Examinations nung takok tajung mengutetba atema tebilemtsü abenba lemsatet.

Paisa Principal aser tesayurtem dang quality education agüja lanurtem tarutsü jenjang tajungba yanglutsütsü ayongzüik.



India nüjiso ngur küm 75 ajungba benjongmung tenzüka sentong ka Secretariat Plaza, Kohima nung March 12, 2021 nü agidang school tanurtemi Dandi March chilushi sayuba noksa ka yangi angur.



Hokolbarnü Arunachal Pradesh Governor BD Mishra-i East Siang district kübok Niglok nung Dandi March nung shilem agiba noksa nung angur. Iba sentong ya "Azadi Ka Amrit Mahotsav" nung shilem ka ama ayonga agi. India linük nüjiso ngur küm 75 ajungba tenüng nung linük ajungalen "Azadi Ka Amrit Mahotsav" amonger. (Itanagar, March 12)

Raijor Dal president Akhil Gogoi-i Sivasagar nungi tokteptsü

Sivasagar, March 12 (Agencies): Raijor Dal president Akhil Gogoi-i Assam Assembly election nung LPG cylinder maitsü amer tokteptsü. Election commission-i Akhil Gogoi'er telok atema LPG cylinder agizükogo aser pai Sivasagar menden nungi tokteptsü.

Raijor Dal tenüng nung Krishak Mukti Sangram Samiti (KMSS) General Secretary Dhairya Konwan-i Sivasagar

nung Returning Officer ket nungi election symbol agizük. Ajisüaka, Raijor Dal-i election commission tsüngdang political party ka ama mezüluok. Iba jagi Raijor Dal candidate ajaki independent candidate tem ama dang tokteptsü.

Akhil Gogoi-i Assam Assembly election nung menden ana nungi tokteptsüba liasü saka Mariani nungi nomination agienogo.

"Akhil Gogoi-i Mariani

constituency nungi nomination agienbaji BJP tamakok ngudaktsütsü atema lir," ta Raijor Dal working president Bhasco De Saikia-i ashi.

"Akhil Gogoi-i Mariani nungi zübazüba takok angutsü kechiyong ibaji par constituency lir. Saka Assam nung BJP anema sorkar ka akümtsü atema onoki iba telemtetba agi. Iba ajanga Mariani nung BJP-i tamakok angutsü" ta Saikia-isa ashi.

AR ali nung land patta agütsüba meyipa agientsü: Minister Lalruatkima

Aizawl, March 12 (Agencies): Aizawl nung Assam Rifles headquarters kimung nung kija nem land patta agütsüba agientsü atema Mizoram sorkari mapa inyaker, ta state land revenue & settlement minister Lalruatkima-i ashi.

"Chief minister Zoramthanga lenisüba kübok State Cabinet-i 2019 küm nija telok nem Land Settlement Certificates (LSCs) agüja aliba ajak agientsü atema telemtetba agiogo. Iba ya Aizawl nung Lammual area (Assam Rifles ground) nung lir" ta Minister Lalruatkima-i metetdaksü.

Central committee of Young Mizo Association (Central YMA)-i Lammual nung kijatem nem kimung lemozüksüba anema okadak Public Interest

Litigation (PIL) ka benoka lir, ta paisha ashi.

"Sorkari land patta ano magien aser okadaki obendang agütsüba atar" ta paisha shisem.

Taoba Congress sorkartemi ketdangsiüdang Assam Rifles ali nung nisung 50 shi nem land settlement certificates agütsü ta Lalruatkima-isa ashi.

Taoba MNF sorkari Assam Rifles ali nung iba ama certificates agütsüba noktangtsü atema ozüng ka yanglu, ta paisha metetdaksü.

February 19, 2019 nü Union Ministry of Home Affairs (MHA)-i Assam Rifles dang May 31, 2019 tashi nung battalion headquarters Aizawl nungi Zokhawsang-i belentsü tetuyuba agütsü.

Zokhawsang ya Aizawl nungi kilometre 15 shi pilar lir.

Centre-i tetuyuba agüjaka Assam Rifles-i tang tashi Zokhawsang-i battalion headquarters mebelen lir.

1917 nungi Assam Rifles headquarters ya Aizawl tiyongtzü nung ali tulu ka nung amenoka lir.

Aizawl nungsa Zodin (Lammual) aser Khatla tesemtem nunga AR indang teseptem amenoka lir.

1988 küm security force-i civilian 7 tepsetba sülen MNF sorkari Assam Rifles' headquarters Zokhawsang-i belentsü atema takhangba agüja liasü.

Chief minister Zoramthanga-i Union home ministry dang Assam Rifles headquarters tekaratiba nung belentsü atema shidi züluogo ta ketdangsür kati ashi.

NPP-i Assam nung menden 5 nungi tokteptsü

Guwahati, March 12 (Agencies): National People's Party (NPP)-i Assam Assembly election nung constituency 5 nungi tokteptsü.

NPP-i Chabua, Badarpur, Jorhat, Baithalangso aser Naoboicha mendentem nungi tokteptsü aser candidate tem shimogo.

Meghalaya Power Minister aser NPP National General Secretary James Sangma-i

Assam Assembly election atema candidate tem tenüng metetdaksü. Pa ya NPP Assam Unit atema Finance in-charge lir.

NPP indang candidate tem: Chabua nungi Bhaben Barua, Badarpur nungi Abu Sahid Md Zakir Hussain, Jorhat nungi Arbin Kumar Barua, Baithalangso nungi Velcome Teronaser Naoboicha nungi Biri Joy nungertem lir.

AR-i Rs 4 lakh alangba heroin apu

Aizawl, March 12 (Agencies): 23 Sector Assam Rifles indang Aizawl Battalion-i Mizoram nung heroin gram 91 apu.

Osang tejangja ka angazükba sülen Assam Rifles aser excise & narcotics department ketdangsürtemi mita aodang

Rs 40,95,000 alangba heroin apu.

Iba dak sendakba nung nisung ka pua lir, ta Assam Rifles sangdong ka nung ashi.

March 9 nunga Assam Rifles sepaitemi Champhai district nung Rs 1.3 crore alangba osettem miima shibelenba apu.

Manipur telungpur tanishir ka Mizoram nung apu



Aizawl, March 12 (Agencies): Brihostibarnü Assam Rifles-i Aizawl nung Manipur nung amenoka aliba telungpur telok Kuki National Army (India)-KNA (I) tanishir ka apu.

Iba nisung ya Nehjang Haokip (47) ta jangjaogo aser pa ya KNA(I) indang commander-in-chief lir, ta ketdangsür kati ashi.

Osang kar angazükba sülen 46 Assam Rifles sepaitemi yashi Aizawl kübok Zemabawk Thuampui tesem nung mita aodang Haokip apu.

Pa ya Manipur kübok Churachandpur nungi lir aser pa ket nung prangpong kecha

mengutet. AR-i pa Mizoram police ket nung agütsüogo.

Kuki National Army (I) ya Kuki National Organisation (KNO) indang armed wing lir.

KNO kübok telungpur telok 17 shi lir aser United Peoples' Front (UPF) kübok ano Zo kin telungpur telok 8 shi lir.

Telok ajaki 2008 küm Centre aser Manipur sorkartem den Suspension of Operation (SoO) nung sign sütepogo.

Telok ana yagi mezüng nungho Kuki nunger atema state balaka meshi saka tang parnoki Indian constitution kübok Kuki nunger atema "territorial council" ka kümtettsü akhanger.

Arunachal nung tanur tetsür ka asüba atema nisung 3 apu

Itanagar, March 12 (Agencies): Arunachal Pradesh kübok Upper Subansiri District nung March 1 nü arishi küm 6 tain tanur tetsür ka indang tasü mang angu.

Osang angazükba agi tanutsüla indang mang nungji taitüsü keta liasü. Külen, pa tebu tanubo Kulen Dubi-ia tanutsüla mang nung zübotem liasü.

Ajisüaka postmortem nungho tespetba kuli kecha mangutet.

Tanutsüla dak tashiyim mapa inyakba sülen tepset ta Dubi Welfare Society (DWS)-i tai tongloksür.

"Tanutsüla indang temang ajunga nung zübotem keta liasü.

La tzü aoba shilem nunga yirua liasü. Anogo aika la dak tashiyim mapa inyakba sülen ang tepset ama kuli angur" ta DWS-i ashi.

Iba dak sendakba nung police-i tanutsüla den alir nisung 3 apu. Par asemji Michael Garam, Jeemi Hangkar aser Jeeking Hangkar nungertem ta jangjaogo.

Itanagar nung aliba Woman Police Station nung Indian Penal Code (IPC) aser Protection of Children from Sexual Offences (POCSO) Act kübok ken o tem benokogo.

"Iba atema bushisingdang südar" ta Itanagar Capital Region SP Jimmy Chiram-i ashi.



Meghalaya Chief minister Conrad K Sangma-i Civil Hospital, Shillong nung COVID-19 vaccine mezüngbuba dose agidang tangokba noksa angur. Tanü pai vaccine agiba sülen frontline workers aser teintet rogo ajak dang Covid vaccine agitsü atema tayongzükba agütsü. (Shillong, March 12)



TIR YIMYIM YIMOBILEM (EDITORIAL)

DIMAPUR KÜPTOKNÜ, METSÜREMI (MARCH) 13, 2021

Asenokbo kümdangtsüla

Nagaland nungbo Covid-19 tashidak mesen putetertem ajak amato jungogo aser tasen putetba osanga mali ayongayonga kümogo. Iba jagi nisungtem aika teni-tebanga menembangi shishilemdak aser lokti nung senzüba angur. Ajisüaka, ibaji ajak asoshi kanga lendong lir. Covid-19 tashidak mepoktet danga temang anema alitsü asoshi wainshin metetertemibo teti kima yimdongi aodang teka nung tashidak mesen metemdaktsütsü asoshi tekabu shidokba mozü, hand sanitizer, amshi aser auyi aser yimra manga nungi kümzüksü asoshi teti sü agi teni tebang nembanger senzü. Aji oda, kima yimdong nungi arur külen mesüra metsümeshir külena teti teka metsüker külenang tejak meyi aser kinungertem den külemi chiyongtsü achi. Kinü tanur alir tsüraburtem, balaka, kima yimdong nung semer senzüba süoshi ajak melener külenang tanur ajunga aru. Iba amaji libaliro nung wainshin metetertembo pei kümdang kümdanga lia arur. Atangji, asenok aikati Covid-19 tashidak wara pokteter külenang teka shidokba mozü tzü, hand sanitizer, amshiba ya metet aser teka shidokpet shidoka alitsü nungdakba angatet. Ashiko, asenok karibo Covid-19 wara poktetba sülen dang hand sanitizer mozü tzü yaa yanglutet südi ta bilema alitsüa akok. Iba tashiji asenok ya mashimemetet nungji mashimashi lia aruogo. Ajisüaka, joko tangbo asenokia asen temang anema alitsü asoshi kümdanga alitsüba yimya karbo angazüker asünungji, joko mashimemeteter ka ama masü saka temeteter aser tangateter ka ama lokti nung asenoka tangar asoshi tatishitsü tajung küma alitsübaji kanga nungdaker. Asenoki jungjunga bilemdangra, kima yimdong nung nisungtem ajurua salemtsüba ya tesempatsüka lir, kechiyong asenok oli aruli jajadanga mesüra mena dang kazüdanga teni arokshir aser nep asükdok dang tekapu menener. Aji dang masü saka metsümeshidak, teburtem balaka temeyong menenadoker aser iba kasa tekaji meshidok ser nisung ajak den salemyonga aoer. Ibaji kodang asenoki jungjunga bilemdangdir, tangar dang nungi asenok tashidak menatsüba tebilemtsü masü saka asenokiang tangar dak tashidak menaloktsütsü tebilemtsü tuluba lir ta angatettsü. Ibayongji, nisung ajak dang teka shidokpet shidoka merüka alitsüba ya tongtibanga ta asütsü atema, asenoki dang temulung agüja mamonger dang ashi, küm shia alima ajunga nung October 15 anogo ya Teka Metsükba Anogo, Global Handwashing Day, amonger. Koba tashidak südirsüaka asenok temulung ulutsü kecha mali, kechiyong tashidak mesenji asenok tenük agi mangur aser tashidak agi tongerbo taneptsü tasak. Iba jagi shin o ka nung, "shirang tenzüker yariba dang nungibo meshirangdang meshirangtsüsa tashidak nokdang tajungba," ta ashiba asenoki meteta lir. Covid-19 tashidak nungi jenbutsü asoshi asenoka meshirangdang meshirangtsüsa nokdang tajungba, kechiyong asenokbo sensaker, anungji tangar takar ama mozü ki tajung nung oa jet ta meyaritettsü. Ano, asen lima nungbo, tangar lima nung akaba ama shiranger yaridak mozü ki tajunga mali, anungji anepaludi asüyonga anepalu mesütet nisung aika repranga südaktsüogo. Aji oda, asenok ama sensaker lima nung sensakertembo akok tashi meshirangtsü merangtsüba dak alaka, shirangner amato timtem tilakata magitet, teni tebanga menembang, tekapubo anogo nung chiyongdang khien mashimashi tzü agi metenba dak alaka sapon amshiabo meshidoker ta zübazübaa malitsüla. Tashidak ya mali masü lir, anungji asenok peisasa kümdangtsüla. Covid-19 ama yimra manga saka tashidak tesashi nokdangtsü asoshi mapabo tasak masü melamelar, teti yimdong nung jajadang aser lokti nung alidang sü agi teni tebang nembangtsü aser teti tekapu merüka ayutsü. Iba yabo asenokia atsüayong mesüi inyaktettsüla.

OLEMSABANG

AO KIN NUNG TELOK PALALA NUNG RONGNIRTEMI (SENSO) ASER (LOKDI) OLONG ANA TETEZU MEMETET ZÜLUSAR

~ K.Lima Longkumer

(Yashi adok nungi...)

10. Tsükong ('S' jagi kechi tütüzü sayur) Tzükong
11. Prangbong Merangbong
12. Sendong (Programme) Sentong (Programme)
13. Sentong (Capital) Sendong (Capital)
14. Tapet (Aor-i amshiba rongnung iba Olong ya tütüzü mashilen amshir) Tapüp
15. Auditor dang PUKÜN ta ajatsüla .Tentet nung inyaker kari Auditor dang kumbu ta sentong nung ajenlokba angur .Tatongsemer aser tezülurtemi kumbujia tütüzü memetet oda amshir .Senso Telongjem nung tezülur jagi Ao oshi shidak zülutsüla ,kechiyong senso atema zülupanglu nung ta tejakji (front) secretaries tem lir .Senso telongjem nung secretary -ji Ao oshi junga memetetra taktsüka ,olong tai amshia nüpur aser Senso manitsüla .
16. Ken Khün (Song)
17. Ken Kün (Kün atema /For a short time or period)

Aor Songjen atema oshiopün yanglushitsü AS-i tutuyuba agüja ASLB nem nungloksüba jogo küm aeka inyaka arur aser jogo küm aeka Arangtet tatidang akia arur ,ajisaka Arangtet tatidang agütsür nisung dain kati zülumün tai amshiba düzüdanga Tir yimyim nung 2020 küm adoktsüba tu ASLB aser AS-ia züngshir na? Arangtet tatidang agütsuri zülumen taia ta ashitsusa ASLB-i Zülur zungdaksur na ? Tanü tashi Aor ajaki jogo zülumen kar yamai melenshir ta osang kecha maka bi amshinütsu amshia züluyongbo ASLB-i tanü tashi yimjak nung metongshitsüba maka (Kibur mali ama).Nisung kari ASLB-i tai inyaker anungji paji melenang ta shira AS-i kaküt zülur jar pai züluba meiyiba akidaktsür .Kum ishika ogo onok kibong telongjem-i kübo(Father) India army -i tepsetba nungtem nung kaküt ka adok idangji kaküt adoktsü temelaba den metongshitsü ASLB nem agütsu ,saka idangji ASLB member anadi kati pen tanak kati pen temerem agi melenshiba nunga tenada palala aeka liasü, itangji onoki kaküt nung MERANGBONG ta zülü saka parnoki PRANGBONG ta melenshitsü, Ao oshiopün aser tütüzü akütba olong raksarji tang aser tarutsü nunga nibo makizüksü .

Küm aeka asen Aor -i President dang TIR ta amshia arur aser Dimapur nungi K.Temjen Jamir-ia Tir Yimyim ta nungja agüja küm aeka adokdar. Kobala -ang akitsüar nibo memetet aji saka taoba AS kütdangpur ,Ao senden 19 buba AS Mongdang Sentong (Programme) nung TIR ta masü DIR ta ajenloker anügo ananü dongjadongja adokba ngugo. Kü indang DICTIONARY nungbo DIR-ji 80(Eighty) nung amshidar ,sürabang koba shidakba ?aji mesüra koba amshitsü?Nia TIR (President)ji shidak ta agizüker Imsusur-i aibelendang nüpur asüktemer ta Laishiba nung zülua alibajia shir dang ashiba ?Nüpuri (Sarudoker) kodanga Imsüsür martsür aser senje majer (Imsüsürji imsüsür).

Taoba mapang ni Senso Telongjem nung SENSO melen LOKDI sendong nung zülua aliba medongshitsür külena ano kum ana tashi küsa tang memelenshi adokba angudang süngmanger .Tanübo Senso nung lennir aser tashi temeteter ama bilema alitsü saka asüngbo kü dang nungi kecha palaka masütsü . Ajisaka AO oshibo Aor ajak meyong asünung shidak asütsula anungji Aor Renti (Songjen)-i asen oshi mashimashi mezülusatsüla. Oshi aser zülumen yabo nija meyong masü saka kin ka ayak aser senmang ta Aor Senso ajaki süoki ia akitsüla ta mepishir .

Aor oshiopün bushirtem English nung degree anguba nübu süra parnok jagi Ao oshia shia metetsüla aser tim düsü imya -a metetsüla, aser Aor dang shitakba sayutsula .

Ni ya Class -A-a mazüng saka küm 60 tashi Laishiba ,khün kaküt aser kaküt aika azüngba den nisung dain nungi asüngdanga angazükka aser shesadanga aruba nübu. Ake putu nungi jempia aruba oshi ji tarutsü lanu putu aser alima matem tashi jempia aotsü ,anungji Ao oshi nung Arangtet tatidang agütsür kisüng oshibo masü anungji koba olongsa melenshi aser koba olongsa pendenlok item ajakji Aor ajak dang jungkai adoka newspaper nung sayutsüla ,mesura onok atemabo nenoki inyakba mapajibo menüngtak asü ?Ta künüamate shesadanger .English dictionary nungbo Dictionary reprint asü shia oujang dasün pentenlokba asenoki züngshir ,shidakba akipo Ao Laishiba aser khün kaküt anabrang mapaji ASLB-i shidak inyakteter külen ang lennir Mr S.Medem kichu kohima aser tashit temi melenshiba tem tu inoksema inyakang .Aor oshiopün zülupanglu nung Laishiba /Khün kaküt palaka aser nupurtemi züluba zülumen palaka süra Aor ji oshi ana jimpir aser Aor telok ana ama asütsü.

" Medongshitsür ashe Tartsür masü "

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nüngtugu sayutsüngir Luis Palau alima nungi pilaogo



Abelen noksa nung sayutsüngir, Luis Palau aser pa kinüngtsü Patracia na noksa aser ajichilen noksa nung Luis Palau o Rev. Billy Graham na külemi tangokba tejen noksa angur.

March 12, 2021: Argentina nungi nüngtugu sayutsüngir, Luis Palau mapang talangka tepokpok cancer agi shiranga aruba sülen alima nungi pilaogo; pa arrshi küm 86 liasü.

Brihostibarnü (March 11, 2021) Palau'er chirnurtemi, tawa pa hospital-i anir aoba sülen Brihostibar anepdang pa süogo, ta metetdaksü.

"Kübu tanep alima nungi pilaba osang tejashi aser tepela naprongla nung onoki sangdonger. Pa ajungbena asü saka pai imlaba ama tesünep nung süogo. Kütsü aser kinüngertem ajak junga dang lir," ta parnoki sangdong ka ajanga metetdaksü.

"Iba osang tejashi nung sangdonger, ajisüaka Luis-i tejak chitepa Kibuba ajuruogo. Taruba anogotem nunga maneni onoki osang lemsateptsü," ta parnokisa metetdaksü.

Palau'er kibongi Portland nung nija sentong ka ayongzüka asüpila sentong agitsü aser tarutsü nung iba sentongji online ajanga lemsateptsü.

Par kibongisa memorial website ka tenzükogo aser iba website nungji official osang lemsatepba den nüburtemia pei tebilemba lemsateptetsü.

Luis ya 1934 küm Argentina kübok Buenos Aires nung asoba sülen 1990 küm United States-i oa ministry mapa inyak tenzüik aser

tetsüsa Portland nung Luis Palau Association indang headquarters amenoker inyaka aru.

Palau-i moapu nung ayongzüikba revival sentong tulu aika nung sayutsüngia aru aser aiben Arogo balala den-a ayongteper inyaka aruogo aser item rongnung 2015 küm pai New York City nung Arogo 1000 dak tema ayongdener Central Park nung nisung 60,000 shi adenshia asentenshi sentong agiba densema lir.

2010 küm Palau-i ministry küm 50 ajungba sentong ka Oregon Convention Center nung ayongzüika agi aser iba sentong nungji Portland Mayor, Sam Adams aser Khristan osangtajung kentener, Steven Curtis Chapman natia shilem agia liasü.

2018 küm pa indang tyaküm otsü film "Palau the Movie" saya, iba sülen pai pa dak cancer tashidak putetba osang lemsatepa liasü.

"Ni ita ishika tsüngda alima nungi pilatsüa akok. Ni phone bener marutsttsü, ozü jabasotem den mejembitettsü aser kinüngtsü den-a o mejembitettsüsa akümstüa akok. Ajak renemadokogo, Kibubai taruba ita ka ana tsüngda mesüra küm ana tsüngda anir onüra ni renema dang lir," ta sayutsüngir Luis-i metetdakja liasü.

Pai iba osang lemsatepba

sülen pa küm ana tashi treatment agia liasü. Yaküm February ita nung pai, tashidak tera süngjemogo aser temang tajungba kümdar, ta lemsatep.

Taküm March 1 nü Palau'er jabaso, Andrew-i tebu indang Facebook page ajanga, tebu temang tamajungba küma hospital-i anir ogo, ta metetdakja liasü.

"Kübo mapang kobika alitsüar onoki memetet, saka mapang tonga arudar ama onoki bilemer," ta par jabasoisa lemsatepa liasü.

"Pa tim-matemer saka pelaa alir, nenoki ajungshiba aser sarasademtsüba atema kinüngertemi nenok dang pelar," ta Andrew-isa metetdakja liasü.

Palau-i pa tasütsü mapang anasa ministry partners ajak dang, "Tsüngremji tajung, aser ni tesasaba kecha mali. Pa tenzüikba aser Khrista osangtajung prokba dak alia tajungtiba kecha mali. Ochi mamatoktsüla. Tsüngremi nü taküm amshiba nung pelar. Nai tenzüikba ajanga Pa pelar. Pai menürema na reprangdar," ta lemsatepa liasü.

Palau-i pa kinüngtsü, Patricia den jabaso asem- Kevin, Keith, Andrew, Stephen, aianu- Matilde, Martha, Catalina, Margarita, Ruth nunger aser adianu Jorge den semchir 12 toktsür pilaogo.



Tzurangkong Arogo Tenzüker Telongjem (TATT) Deacon training takok ngua mongogo Aokum Baptist Arogo nung Tzurangkong Arogo nung Deacon tem tenzüikba wadang nung tajungba aser Tsüngrem sentong angateta tenzüiktsü asoshi 12 March 2021 nü kanga temoatsü Ka-a amongba lemsateper. Iba sentong nung Shisalen sayur Rev. Dr.Temsu S. Pastor Alempang Baptist Arogo liasü. Tsüngremi tenzüker taküm wadang jentipur asoshi moajangma ta TATT ajanga sarasademtsü. Iba den külemi Aokum Arogoi apokatsü ajak tenla agutsü nung pelaba shisemer. TATT tenüng Lima Imchen Secy. ajanga lemsateper.

ANOGO ABEN TSÜNGREM DEN

Yisu asoshi chiyungtsü renemtsü

"Anungji idakji parnoki pa asoshi aonung chiyungtsü benjung ka yanglu..." (Yohan 12:2)

Taküm tia jenjang nung kodang takoksa, timtem tejashi agi menepdir nisung mulung sünep O den teyari kanga nüngdaka akümer. Mekoktetsü aliba toa tajungshi O kati takoktsü küma melentsür. Teimla makai alir toa O tajung ka ajanga teimla tasen adokdaksür. Aseni pi timtem nung aliba meteta langka mapa tajung inyaktsübaji koda tajangzük.

Yisu Khrista joko alima nung wadang tatembang leni aruba mapang, pa Bethani yimtak anenzüktsüsa aküm. Iba osang angashia Mary, Martha, aser tenu Lazar-i Yisu asoshi chiyungtsü benjung yanglu. Par aianu aseme Yisu asütsü mapang memetet liasü, saka Yisu asoshibo iba mapaji anisüngzük anguba mapa ka liasü. Temulung nung joko tasütsü mapang tonga aruba meteta pa anisüngzük nüngdaka liasü. Mary, Martha, aser Lazar-i par kidang chiyungtsü renemtsüba agi anisüngzük agütsü.

Koda masüba jenjang nung alibapur asoshi asenia chiyungba benjung ka ayongdi ma? Asen tembar kar, kiyonger, mesüra yimer kar ne tayari tilaka jagi timtem nung alir asoshi koda anisüngzük agütsür. Iba passion week mapang Yisu asoshi ne senpet tulutibaji nai kar timtem nung alidang yaribaji asütsü.

Sarasadem

Kibuba Yisu, timtem nung alir kar tanü ni yariba agi nia na asoshi chiyungba benjung ka renemtsüdi. Timtemer kar dangi ni aniang. Amen.

Carrie Underwood-i 'Nothing But the Blood of Jesus' ken saya




March 12, 2021: Bodhbarnü lai tekarakaba atenba den ken (March 10, 2021) country 'parts' inoksemnüa liasü, ta kentener, Carrie Underwood lemsatepa liasü.

arrshi küm 38 ajungba Kasa ken nung Khristian anogomong nung lai la indang rock kentener telok, osangtajung kensep tasenba Needtobreathe nungi tongti 'My Saviour' nungi ken tasen kentener, Bear Rinehart-ia shilem agia lir. "American Idol" nung tamalen shilem agila,

Jesus," sayaago. Carrie-i la ya Rinehart aser Needtobreathe indang 'fan' ka lir, ta ashi.

"Nothing But the Blood of Jesus" ya Underwood indang osangtajung kensep 'My Savior' nung aliba ken 13 rongnung ka lir. Kasa kensep nung "Softly and Tenderly," "Great Is Thy Faithfulness," "How Great Thou Art," "The Old Rugged Cross" aser "Amazing Grace" kentem densema lir.

Underwood-i tesüsa sayaba kensepji 2020 küm sayaba Khristmas kensep 'My Gift' original ya kanga anür, ibayongji liasü.

OLONG PAITEP # 5751**TIPLÉN**

1. Taochi sayuba - 10
 4. Temezüng agi kongshi - 4
 5. Ainer - 6
 7. Chiyungnü - 3
 8. Mi nung atsük - 5
 11. Asen masü - 3
 13. Lenmang ajurutepdak - 6
 14. Yangi masü - 4
 15. _ _ _ _ _ jang - 6

LANGTSÜNGLEN

1. Menungra - 6
 2. Mi tsükloker mesepba - 4
 3. Süngo o tzü ajemba - 5
 5. Temenemsü tajung - 7
 6. Idak - 4
 8. _ _ _ _ ok - 4
 9. Tebangi apuba kongki tapu ka - 6
 10. Tashi endokba metet - 5
 12. Tzü manung senzüba - 4

OLONG PAITEP # 5750 TELANGZÜBA**TIPLÉN :**

1. Rebeka, 4. Adam, 6. Yohan,
 9. Zü, 12. Sayutsüngir, 15. Ku,
 16. Naman, 17. Abel, 18. Samuel.

LANGTSÜNGLEN :

2. Kan, 3. IM, 5. Anüng, 7. Amsü,
 8. Yosep, 10. Sara, 11. Isak, 13. Yakob,
 14. Nana, 16. Noa, 17. Am.

Noksa nung meputepi aliba 5 bushiang

**TANÜBO NAI LANGZÜANG**

- Q. Economic Freedom Index nung linük koba ajanga mezüng jenjang ngutet?
 A. Singapore B. New Zealand
 C. United Kingdom D. Germany

===== (Taruba adok nung onoki langzüksü)

YASHI ADOK TELANGZÜBA : 70

AO OSHI ANGAZÜKDAK:**Ni****TANÜ ANGAZÜKTSÜBA OJANG**

(pro) Peisasa (I)

* Ni kanga pelar.

Ne

(pro) Peisasa agi (Me)

* Ne na kanga meimer.



Tir Yimym

NAI-A YA METETTER MA?**MARCH 13 NÜ ASOR TONGTIBANG NISUNG KAR:**

- English chemist Joseph Priestley (1733)
- Astronomer Percival Lowell (1855)
- Science fiction writer aser Church of Scientology ngutetsang L. Ron Hubbard (1911)
- Taoba mapang CIA Director William Casey (1913)
- Cartoonist Al Jaffee (1921)
- Actor William H. Macy (1950)
- Actor Dana Delany (1956)
- Musician Adam Clayton - U2 (1960)
- Actor Annabeth Gish (1971)
- Actor/rapper Lonnie Rashid Lynn Jr. (1972)
- Actor Danny Masterson (1976)
- Actor Noel Fisher (1984)
- Actor Kaya Scodelario (1992)
- U.S. Olympic gold alpine skier Mikaela Shiffrin (1995)
- Derek O'Brien (politician) (1961)
- Varun Gandhi (politician) (1980)

SUDOKU # 5792

3	9			1	7			
7		4					2	
2				5		9	7	
	7	9			2	8	3	1
5						6		
		6	8	4				
8		2		3	7			
	1			9	8	5		
		7					8	6

TELANGZÜBA # 5791

7	2	3	1	4	5	6	8	9
8	9	4	6	2	3	1	5	7
6	5	1	7	8	9	2	4	3
5	1	8	4	9	2	3	7	6
3	6	2	8	1	7	5	9	4
9	4	7	5	3	6	8	2	1
1	3	5	9	7	8	4	6	2
2	8	9	3	6	4	7	1	5
4	7	6	2	5	1	9	3	8

OJANG LUTEP # 5338

BAENTG	:						
AIG	:						
DGAN	:						
SANAABE	:						
JBMBIEETTA	:						
GIJA	:						
PMAA	:						
KNGAAOD	:						
GNNEUR	:						
OTMASÜ	:						

OJANG LUTEP TELANGZÜBA # 5337

TAJUNG DANG JEMBI YONGJIA TAMAJUNG DANG
 BILEMERI TAJUNG KODANGA MAGIZÜKTSÜ

TAN HOPTA ATEMA - KOMA SÜLA ?

Q. Asenok sobaliba nung ali senmang amangtepba yimya ya, akhi tsürabur senmang aser tanü putu senmang ta ana küma bendanger amangtsü tenzük nunga koma süla?

Olong 20 shi nung March 12, 2021 tashi nung iba telangzüba ya onok dangi (e-mail - tiryimym@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.



March 12, 2021 nü Ahmedabad nung Ato kilonser, Narendra Modi-i India nunger nüchiso anguba sülen küm 75 ajungba nüngtem nung 'Azadi Ka Amrit Mahotsav' sentongtem tenzüksüba noksa nung angur. Kasa noksa nung Gujarat Angh, Acharya Devvrat, Gujarat Chief Minister, Vijay Rupani aser Minister of State for Culture & Tourism (Independent Charge), Prahlad Singh nungera angur.

Modi aser Shah nati Bengal, Assam, Kerala nung nüboyimtsütsü

New Delhi, March 12 (Agencies): Ato kilonser, Narendra Modi aser Union Home Minister, Amit Shah nati assembly election agitsü aliba state tem- West Bengal, Assam aser Kerala nung taruba hopta nungi tenzüka ita tatembanglen tashi party atema nüboyimtsütsü.

Osang angazükba agi, Ato kilonser Modi-i West Bengal kübok Purulia nung March 18 nü nüboyimba sentong ka nung jembitsü, March 20 nü Contai nung aser March 21 nü Bakura nung nüboyimtsütsü. March 14 aser 15 anogo na nung Amit Shah-i West Bengal aser Assam na nung nüboyimtsüba sentong nung shilem agitsü.

Iba sülen Modi-i March 17, 21 aser 23 anogotem nung Assam nung nüboyimtsütsü

asert West Bengal nung March 19, 26 aser 27 anogotem nung nüboyimtsütsü.

March 24 aser 25 na nung pai Kerala semdangtsü aser election nüboyim sentongtem nung shilem agia jembitsü. Iba mapang nung Shah-i taoba mapang pa BJP Tir inyakdang West Bengal nung party nung inyaker 122 asüba kibong züngsemtem ajurutsü.

Osang angazükba agi, West Bengal nung BJP chief minister candidate tenüng mesangdong anungji party-i Ato kilonser, Union Home Minister aser party National Tir, JP Nadda nung dak rangloker vote atema nüboyimtsü.

BJP lenirtemi ashiba agi, yaküm Bihar assembly elections nung Ato kilonseri nüboyim sentong 12 nung jembiba ajanga

party-i jenjang junga ngua liasü, yamaji Bengal nunga pai nüboyimtsüba ajanga party jenjang ajungtsü, ta party-i imlar.

Taoba mapang Karnataka nunga Ato kilonseri nüboyim sentong 20 nung jembiba aser Uttar Pradesh nunga nüboyim sentong 20 dak tema nung jembiba liasü.

West Bengal nunga Ato kilonseri nüboyim sentong 20 dak tema nung jembitsü aser Assam nung nüboyim sentong trok nung jembitsü.

Taruba West Bengal assembly election nung BJP-i ruling party- Trinamool Congress den tongti sür tokteptsü. Assam nunga chief ministerial candidate tenüng mesangdong, ibayongji Ato kilonser aser Home Minister nati iba state semdangtsüji kanga tongtibang.

MNM tongti, Kamal Haasan-i Soimbatore South menden nungi tokteptsü

Chennai, Metsüremi/March 12 (Agencies): Film actor nungi yimtenren nung nung DMK Tir, M K Stalin-i ajemoksang, Kamal Haasan-i tang mezüng assembly elections nung shilem agia Coimbatore South constituency menden nungi tokteptsü.

Tamil Nadu nung assembly elections April 6 nü agitsü.

Hokolbarnü Chennai nung Makkal Needhi Maiaam (MNM) party tongti, Kamal Haasan-i party candidate tem tanabuba list sangdonga liasü.

Pa tebu asür, Sreenivasan bilemteta Haasan-i, assembly nung nüburtem atema ola adoktsü atema constituency nung nüburtemi ni yari kü nem vote agütsütsü imlar, ta ashi.

Osangbenertem den jembidang pai, "Kübui ni IAS officer ka kümdaktsünüa liasü, iba sülen yimtenren nung ajemokdaktsünüa liasü. Ni pa tebilemba matalokdaktsütet (IAS officer maküm), ajisüaka ozü party nung taoba mapang IAS officers aika lir. Iba ya onok asoshi nüma atangtsü

mapang ka lir," ta ashi.

Ano külen, taruba election nung DMK Tir, M K Stalin-i Kolathur constituency nungi tokteptsü aser par jabaso Udhayanidhi-i tang mezüng Chepauk-Triplicane menden nungi tokteptsü.

Stalin-i candidates ajak 173 tenüng sangdongogo aser parnok rongnung taoba mapang minister tem aser tang MLA tem- Durai Murugan, K N Nehru, K Ponmudi aser MRK Panneerselvam nung densema lir.

Chennai nung aliba DMK headquarters Anna Arivalayam nung osangbenertem den jembidang Stalin-i, March 15 nü pai nomination file asütsü iba sülen maneni nüboyimtsü, ta metetdaktsü.

Tamalen (2011 küm tashi) DMK-i state yimsüsüa liasü aser taruba election nung parnoki AIADMK sorkar atsüngdoktsü nükjidong nung Congress, Left, MDMK, VCK aser party tila ishika den teloktep yangluogo.



March 12, 2021 nü Chennai nung osangbenertem senden ka nung Dravida Munnetra Kazhagam (DMK) Tir, MK Stalin-i party candidate tem sangdongba mapang tangokba noksa nung angur. Tamil Nadu nung Assembly elections April 6 nü agitsü.

SKM-i WB nung aluyimertem dang BJP nem vote magütsütsü mepishi

New Delhi, Metsüremi/March 12 (Agencies): India nung aluyimertem union 40 dak temai akümba tentet- Samyukta Kisan Morcha (SKM)-i Hokolbarnü West Bengal nung aluyimertem aser alu nung aayangertem dang taruba West Bengal assembly election nung BJP nem vote magütsütsüla, ta mepishia metetdaktsü.

Osangbenertem den jembidang SKM lenir, Yogendra Yadav-i, "Onoki party kecha meyarir mesüra nüburtem dang party kar nem vote agüjang ta

memepishir, ajisüaka BJP dang tansütsü lesson ka sayuang ta mepishir," ta metetdaktsü.

SKM-isa, election nung tamakok anguba ajanga Centre nung BJP-i aniba sorkari aluyimba dak sendakba ozüng tasen asem agientsüsa akümtsü, ta ashi.

SKM-i shidi ka ajanga West Bengal nung aluyimertem dang taruba election nung BJP nem vote tagütsü; election nung tamakok anguba ajanga dang Centre-i aluyimba ozüng tasen asem agientsüsa akümtsü, ta

metetdaktsü.

Social activist Medha Patkar-i, BJP-i corporates kar dang linük ayoktsü meranger, ta shia nüburtem dang kanga shisadanga vote agüjang, ta mepishi.

Aluyimertemi longkak aitba Centre sorkari mezüngmeshir, ta shia Patkar-i, British nung yimsüsüba mapang nunga tang aliba sorkari inyakba amabo meinyak, ta ashi.

Laisa West Bengal assembly nung aluyimba ozüng tasen asem anema bangzüng ka renemba atema pelaba lemsatop.

West Bengal nung Covishield Vaccine agiba sülen nisung ana asü

Kolkata, March 12 (Agencies): West Bengal nung coronavirus vaccine - Covishield agiba sülen teintet senso ana süogo; iba tatalokba bushisüngdangtsü atema state health department-i maparen tenzüka inyakdar, ta ketdangser kati metetdaktsü.

Coronavirus vaccine agiba sülen asür anaji Darjeeling district nungi arrshi küm 75, Parul Dutta aser Dhupguri nungi arrshi küm 65, Krishna Dutta na lir, ta jangjaogo.

Mezüng bushisüngdang ajanga, tenaprongla asübaji temelungjang tashidak den sendaktepa lir ta bushitetogo, ajisüaka health department-i maneni bushisüngdangdar.

"Covishield vaccine agiba sülen North Bengal districts nung March 8 aser March 9 anogotem nung nisung ana süogo. Mezüng bushisüngdang ajanga tena asübaji

temelungjang dak sendakba tashidak ajanga asü ta bushitetogo," ta ketdangseri metetdaktsü.

Brihostibarnüa West Bengal nung coronavirus tashidak agi shiranger nisung asem süogo; state nung iba tashidak agi asür ajak senteperbo 10,286 jungogo.

Brihostibarnü coronavirus tashidak agi asürtemji ana North 24 Parganas district nungi aser ka Howrah nungi lir, ta ketdangsertemi metetdaktsü.

State nung nisung ajak agi 5,77,511 dak coronavirus putetogo aser iba nungji tesüiba ghonda 24 tsünga nisung 244 dak putetba densema lir.

Tang Bengal nung coronavirus agi teshirangdakpur 3,110 lir aser iba tashidak agi shiranger 5,64,115 bo anepadokogo.

Brihostibarnüa nisung 85,519 nem coronavirus vaccine agüja liasü.



Mumbai, March 12, 2021: 1993 küm bomb aika amshia Mumbai nung tesem 12 amakba sülen küm 28 ajungba anogo nung Mumbai nung aliba Century Bazar nung nisungtem adenshia iba lendong nung asürtem nem akhüm agütsüba noksa nung angur.

Anüolen linüktemi Russia dang Navalny chioktsü akhanger



Geneva, Metsüremi/March 12 (Agencies): United States densema linük ter dak temai Russia dang Kremlin anemsang, Alexei Navalny chiokang ta Hokulbarnü takhangba agütsüogo aser pa ya ozüng alema apu ta shia taoba küm pa dak miim amshiba indang bushisüngdangtsü ashir.

Geneva nung UN Human Rights Council amemdang Poland-i sangdong ka zünga ashidang, opposition lenir anemq Russia ketdangsürtemi inyakba ya tim mapa masü asr yimten yimsüsür shilem lir, ta ashi. Linük 45 ya timba Europe nungi liasü, saka Australia, Canada aser Japan dena liasü.

Navalny ya Tir Vladimir Putin anemer nübu tejanga ka lir, shiba lokti sen pei atema amshiba ken o nung aija küm ana ser tesadang tepuokdak ayutsü taoba ita obendang agütsü.

"Navalny aser dangar shirnoksa pua ali, parnok ajak tangsa chioktsü onoki Russian Federation dang akhanger," ta sangdong ajanga ashi.

"Russia nunger yimti aika nung Navalny bukuma longkak aitba taochi mesayui apuba asoshia onoki süoki ia bilemstsür," ta sangdong ajangasa ashi.

Iba ama taitsuba o jembiba ya linük telungzük inyakyim nung shilem agir, ta Russia-i

taoba mapang shia liasü.

Taoba küm military-grade nerve agent miim amshiba indang bushisüngdang mesüi tepuokdak ayuba ya maksü lir, ta Britain ambassador Julian Braitgwaite-i ashi.

Navalny ya Russia indang Vladimir region nhng tepuokdak ka nungi anir ogo aser tang pa kong aliar memetet, ta pa okatsüri Hokulbarnü ashi.

Navalny tepsettsü merangba atema Russia tenüng asentsüla aser pa dak miim amshiba asoshi linük ajungai bushisüngdangtsüla, ta UN human rights mongintemi March 1 nü shia liasü. Moscow-ibo Navalny dak miim mamshi aser kulia maka, ta ashir.

"Tanü sangdong ya Council ajanga temaba jenjang nung mitba tetenzüker asütsüla," ta New York nung amenoka aliba Human Rights Watch nungi John Fisher-i ashi.

Navalny ken o nung United States aser European Union ajanga Russia nunger kar nem tenokdangba balala agüja lir.

Pakistan nung mijang ator trok asü

Marwar, Metsüremi/March 12 (Agencies): Afghanistan den arrtsü anasa Pakistan southwest tsütsü mijang atodak poka mijang ator trok asü, ta ketdangsürtemi Hokulbarnü ashi.

Balochistan province kübok Marwar tesem nung mijang atodak ali telung feet 1,000 shi lur methane gas bendena aliba poka mijang ator nisung ti tashi temai madokteti liasü aser item rongnungi nisung trok asü, ta ketdangsürtemi ashi.

"Lendong agi kongshia alidak nungi tekumzüker temi tanep nisung tasüimang trok agitetogo," ta directorate of mines nungi ketdangsür kati ashi.

"Iba mejang atoba tesem shibangogo aser Chief Inspector of Mines ajanga

bushisünhdangtsü tuyuogo."

Brehostibar nikingdang mijang ator nisung ti dak long tulu agi alua aon, ta yangji tekumzüker ketdangsür Imdad Khan-i ashi.

Rescue operations ghonda ishika agiba sülen mijang atodak nungi yirur alir ana agitet.

Taoba mapang Balochistan nung lendong balala 72 tashi ataloka mijang ator nisung 102 süogo, ta Balochistan Coal Mines Workers Federation indang tir Sultan Muhammad Lala-i osangbener dang ashi.

Mijang atoba tesem nung sorkar aser mijang atoba tesem kiburtemi lendong nungi jenbutsü meratem magir, ta Lala-i ashi.

Safety standards kanga ajemba aser mapa inyaktüsü

mesademba ajanga Pakistan nung mijang atoba mapa ya lendong aketba mapa tem rongnung ka ta züngshir.

Marwar nung 2018 küm May ita methane gas ajanga mijang atoba tesem ka poksa yangji mapa inyaker nisung 20 asü.

Kasa küm August ita Quetta yimti nung methane ajanga mi kaoloka apokba mapang nisung tenet asü.

Balochistan nungsa 2011 küm methane gas ajanga mijang atoba tesem ka poka mijang ator nisung 45 tashi süa liasü.

Nütsüing yongsük apu apua aliba Balochistan province nungya mijang (nakmati), natural gas, yongmen yin aser hon aika lir, aser item ya timba China teyari nung toteter.

US-i Visa Applications tasen agizüktsü

Washington, Metsüremi/March 12 (Agencies): Taoba tir Donald Trump-i Muslim nunger timba aliba linük aser Africa linük 13 nem senzügenpongtsü atema tenokdangba agütsüba ajanga US visa bushir shirnok nokdanga liasü, parnoki visa atema tanaben merangdangtettsü mesera tasen apply sütettsü, ta State Department-i Hombarnü metetdaktüsü.

'Muslim ban' ta nüngja agütsür Trump-i tenokdangba agütsür aliba ya tir Joe Biden-i mapa belenzükba sülen mezüngbuba anogo; January 20 nü agintsü. Pai ashiba agi, iba tenokdangba ya linük mulungsentsü nung tarak ka lir.

State Department otongdar

Ned Price-i, applicant shirnok January 20, 2020 masü tsüngda visa atema benokba magizüki lir parnoki application tasen benoktsüla aser application taa agütsüshitsüla. 2020 küm January 20 sülen visa mangurtemi application tanaben mebenokshi asadangshitsü atema mepeshitettsü aser parnoki taa talila agütsütsü nüngdak matoktsü, ta ashi.

Tang benoka aliba fiscal year masüdang diversity visa lottery ajanga shimba applicant shirnok visa mongui lir, parnok US temzüng ozüng ajanga visa agütsütsü nungi nokdangtsü, ta paisa ashi. Diversity lottery inyakyim ya visa aika magütsüba linüktem nungi immigrants tem

agizüktsü nükjidong nung benokba lir.

2017 küm December ita nungi, senzügenpong nung tenokdangba agütsür aliba nung temelenshi benoker aliba US Supreme Court-i agizüka inyaksangshidar aser iba tenokdangba kübok nisung 40,000 United States-i maitdaktüsür, ta State Department data ka ajanga sayuogo.

Trump yimsüsüba mapang iba list nung linük kar bendenlok aser kar agina liasü. Trump yimsüsüba tembangba mapang tashi nung Myanmar, Eritrea, Iran, Kyrgyzstan, Libya, Nigeria, North Korea, Somalia, Sudan, Syria, Tanzania, Venezuela aser Yemen nem tenokdangba agütsür liasü.

50th Wedding Anniversary

13.03.1971 - 13.03.2021



Mr. Onenkaba & Mrs. Teyongmenla Chuchuyimlang

Temeim Tsürabur, Kibong kümer küm 50 tashi Tsüngremi len ania, taküm tajung doktsüba asoshi pa tenüng asanger.

Maneni nena nem Tsüngremi arishi talang aser taküm tajung dokjang ta onok sarasadem.

~ Chirnur & Semchirtem.

50th Wedding Anniversary

13.03.1971 - 13.03.2021



Mr. Imtikokba & Mrs. Tamakokla (Chuchuyimlang Town)

"Kibuba tsüububa jagi arishi atsülanger, saka tamajunger arishi tatsüba akümer" Apijemtsü Shin 10:27

Temeim tsürapur ana kibong kümer küm 50 tashi taküm arishi moatsüba asoshi teyanglur Tsüngrem tenüng asanger. Tsüngremi tsürapur taküm maneni anema aser arishia tokjang ta ozü sarasadem.

- Temeim Chirnurtem aser Semchirtem.

Northwest Nigeria kaketshir aika pua bener ao

Afaka, Metsüremi/March 12 (Agencies): Northwest Nigeria nung telungpur temi military academy ka anasa aliba forestry college ka nungi kaketshir 30 shi pua bener ao, ta ketdangsür temi ashi, koba December ita nungi tenzüka kaketshirtem pua bener aoba pezübuba alitsü.

Tang tesüsa atalokba ya Kaduna state kübok Igabi local government area nung aliba Federal College of Forestry Mechanization, Afaka nung Brehostibar aonung 11:30 ako (par mapang) meta liasü, ta police temi ashi.

"Tebur aser tetsür meyokteper kaketshir 30 shi samar bushir," ta iba state indang commissioner for International Security and Home Affairs, Samuel Aruwan-i Hokulbarnü sangdong ka nung ashi. Iba school nung inyakera kar pua bener ao, ta pai ashi.

Iba college ya Kaduna state yimtiba, Kaduna city tezülen lir, kong telungpurtem mapang shia motorcycle nung jajar.

"College nung azüngertem pua bener aoba tang mezüngbuba alitsü. Telungpurtemi secondary school tem nung ang tenük yoker, kong tanurtem azünger," ta Nigeria yimtiba, Abuja nungi osangbener kati ashi.

Hokulbarnep kaketshirtem indang kinungertem college gate nung adenshi, kong mitkar indang gari 20 shi agi lungbanger liasü. Yangji alir kati aonung 11:30 ako meta prangbong ola angashi, ta phone ajanga osangbener dang ashi.

"Onoki tsüba mebilem, kechiaser ibai Nigerian Defence

Academy nung military exercise kar ang südi ta bilema liasü," ta pai ashi.

Northwestern aser central Nigeria nung telungpur telok balalai senotsü meshitsü atema nisung pua bener aoba, tashiyim agi shi nung medemba amala mapa tali inyak tenzüker küm ishika arur.

Iba tesem nung Nigeria mitkartem 2016 küm yoka 2019 küm telungpur den yimjung tezüngzüktep yanglu, saka lendong agütsüba manener.

Nigeria northwest tsütsü Zamfara state kübok boarding school ka nungi tetsür 279 pua bener aoba chioker hopta ishika arur, aser Niger state kübok school ka nungi tebur 27 pua bener aoba chiokogo.

Iba mapang kaketshir ka khaseta liasü.

Aji masüdanga December ita kaketshir 300 dak tema Kankara nung aliba school ka nungi pua bener ao.

Item kaketshir ya mapang tatsüka lir chiok saka iba tatalokba ya ajanga nüburtem ain adoka liasü. 2014 küm Chibok nung Boko Haram telungpuri kaketshir tetsür 276 pua bener oa liasü. Item tetsür ya karbo tang tashi mangur.

Iba linük nung senotsü meshitsü atema shishilembar, ketdangsür aser nüburtem pua bener aoba bulua ataloker.

2016 küm January ita nungi 2020 küm March ita tashinung nisungpur nem sen million \$11 agütsüogo, ta Lagos nung amenoka aliba geopolitical research consultancy, SB Morgen ajanga ashi.

GOVERNMENT OF NAGALAND
OFFICE OF THE DIRECTOR GENERAL OF POLICE,
NAGALAND :: KOHIMA.

NO.PHQ (D-I)16/2020-21/100

Dated Kohima the th March 2021.

TENDER NOTICE

Sealed tender are hereby invited for supply of the following Centrally purchased Ration for Nagaland Armed Police and Indian Reserve Battalions for the year 2021 - 2022.

Sl. No	ITEMS	Total Requirement
1	Milk Powder (FSSAI/BSI Standards)	213118 Kgs
2	Tea Leaf (FSSAI & Tea Board of India Standard)	53280 Kgs
3	Refined Oil (FSSAI Prescribed Quality)	384796 Ltrs
4	Red Chilly (Dry) (Standard Quality)	88800 Kgs

Interested tender(s) may collect detailed tender notice from the office of the Director General of Police on payment of 500/- (Rupees five hundred) only on any working days and shall be issued with effect from 15-03-2021.

Last date of receipt of tender is 30-03-2021 till 12.00 hrs and shall be opened on the same day at 13.00 hrs in presence of Tenderer(s).

(T. JOHN LONGKUMER) IPS,
Director General of Police
Nagaland, Kohima

Issued by DIPR

MULUNG NEN O



14th Sept. 1965 - 08th March, 2021

Asür B. Moa Tzüdür, Changki, shirangba mapang nungi tenzüka asüba mapang tashi nung kija, kibong, Arogo balala, aser telok balalai, sarasadem, rongsen aser nüngdak mapa kechisarina ajak nung yariogo, item ajak atema ajak dang kangasa pelaba metetdaksür. Tsüngdong arua, onok pelaba nenok den melemsatepteter, iba mulungnen o yagi, nenok ajak dangi tsüngdong arua lemsateper ama agizükdaksünür. Nenok temeim mapa onoki meyipa agütsütsü makoker, saka Teyanglur Tsüngremi nenok taküm, kibong, lokti aser mapa moajangma ta ozü sarasadem den maneni pelaba metetdaksür.

Temeim Kinungtsü, Jala, Jabaso aser Kinungertem.

'Mission: Impossible 7' atema Rob Delaney aniok



New York, Metsüremi/ March 12, 2021 (Agencies): 'Mission: Impossible 7' indang cast rongnung Rob Delaney denogo.

TomCruise indang nüngtugu franchise nung 'Catastrophe' actor, Mark Gatiss, Charles Parnell, Indira Varma, Cary Elwes, aser Greg Tarzan Davis nunger külemi shilem agiba angutsü.

Director Christopher McQuarrie-i Instagram sabang ajanga cast atema züngsem tasen aniokba osang den külemi

noksa lemsatepa liasü.

Mission Impossible 7 atema actor tasentem yagi Hayley Atwell, Pom Klementieff, Esai Morales, Rebecca Ferguson, Simon Pegg, Ving Rhames aser Vanessa Kirby nunger den külemi shilem agitsü terenemba lir.

Iba franchise indang installment tasen dak sendakba nung osang tem ano memetetdaksü aser alima ajunga asüngba coronavirus wara tenokdangba ajanga film production maparen aiben thinenja aruogo.

Mission Impossible franchise indang installment 7buba aser 8buba ya atonga tangoktsü sentong tulu renemer liasü, saka film nung adener cast aser crew tem anisüngzüka inyakdaksütsü asoshi iba sentong agienadok.

Installment tasen atema aiben maparen thinenja aruaka, UAE nung iba film dak sendakba shilem ka takok ngua tangoktetba osang McQuarrie-i tawa lemsatepogo.

"Onok maparen nung

tayongzükba/tetsükdaksü jenti ajuruaka, onoki imlaa ataba ama Abu Dhabi nung tebilemba ka tepor junga inyaktetogo. Cast aser crew ajak tenüng nung, Abu Dhabi Sorkar, 'His Excellency' Mohamed Al Mubarak, Abu Dhabi Film Commission, twofour54, Etihad Airways aser CEO Tony Douglas, ADAC aser CEO Shareef Al Hashmi, UAE dangi HM Ambassador Patrick Moody, United States Marine Corps aser onok maparen nung yarir ajunga dang temulung taroktiba nungi pelaba metetdaksür," ta McQuarrie lemsatep.

"Iba den külemi, sempet tajung alir local cast, crew aser Abu Dhabi nüburtem dang pelaba shisemer. Nenok den tanaben majurutep tashi asenok ajak longjemer inyakbatem menungra bilemtettsü. Tang film dak sendakba maparen kar atema London nung lir," ta pai ashi.

'Mission: Impossible 7' film ya November 19, 2021 nü sayatsü terenemba lir.

India nung Moto G10 Power aser Moto G30 saya

New Delhi, Metsüremi/ March 12, 2021 (Agencies): Mongolbarnü, Motorola-i India nung budget smartphone ana - Moto G10 Power aser Moto G30 sayaogo.

Smartphone anaprongla nung quad rear camera aser Android inoka yanglutsüogo. Smartphone ya Flipkart sabang ajanga sentsü tapu ana nung angutsü. Moto G10 Power ya Aurora Grey aser Breeze Blue colour; kasa mapang Moto G30 ya Dark Pearl aser Pastel Sky nung angutsü. Moto G10 Power aser Moto G30 ya Motorola G-series indang tenth generation budget-mid range smartphone alitsü.

Moto G10 Power jenjang sen 9,999 aser Moto G30 jenjang sen 10,999 alitsü. March 16, 2021 nungi tenzüka Moto G10

Power ayoktsü aser anogo ka sülen March 17 nungi Moto G30 angutsü. Smartphone anaprongla Flipkart ajanga ayoktsü. Specification tsütsü reprangdangra, Moto G10 10 Power nung 6.5-inch full-HD+ IPS display, den Qualcomm Snapdragon 460 SoC, 4GB RAM aser 64GB internal storage angutsü. Iba smartphone inyakyim 6,000mAh battery ka ajanga achaayangtsür aser Android 11 ajanga nungittsü.

Camera atema, Moto G10 Power tesülen quad camera setup angutsü, kong 48-megapixel primary camera, 8-megapixel ultra-wide shooter,2-megapixel macro lens aser 2-megapixel depth sensor angutsü. Selfie atema, Moto G10 Power tejaklen 8-megapixel selfie

shooter dena lir.

Ano külen, Moto G30 Power nung, 6.5-inch display den 20:9 aspect ratio aser 90Hz refresh rate inoka yanglutsüogo. Moto G30 ya Qualcomm Snapdragon 662 chipset den 4GB RAM aser 64GB internal storage ajanga tashi agütsür. Iba smartphone ya Android 11 ajanga achaayangtsür aser 5,000mAh battery ka dena lir, koba 20W fast charging support asür.

Camera tsütsü reprangdangra, Moto G30 Power tesülen quad camera angutsü. Iba set-up nung 64-megapixel primary shooter, 8-megapixel wide-angle lens, 2-megapixel macro camera aser 2-megapixel depth sensor dena lir. Selfie atema, iba smartphone tejaklen 13-megapixel selfie shooter inoktsüogo.

ACKNOWLEDGEMENT



(Born: 24-08-1976 Died: 05-03-2021)

Through this column, we the family members would like to express our profound and sincere gratitude to all those individuals, friends and relatives who supported us financially, morally and physically through constant prayer during the prolonged illness and demise of our beloved **Late. Merenyanger Longchar** (Khensa) on 5th March 2021, at Yimyu Ward, Mokokchung.

Though we are unable to thank each and everyone of you personally, we pray that our Almighty God will bless you all abundantly.

Special thanks to:

1. IMDH staff, Mokokchung

2. EDEN Medical Hospital, Dimapur

3. BLK Hospital, Delhi

4. Discipleship Bible College, Dimapur

5. RTO Officers & staff, Kohima and Mokokchung

6. Yimyu Baptist Arogo, Mokokchung

7. Dr. Tiameren, IMDH Mokokchung

8. Dr. AoakhumKichu, Eden Hospital Dimapur

9. Dr. Yansaromo Yanthan, Eden Hospital Dimapur

10. Dr. Nepuni Athikho, Eden Hospital Dimapur

11. Mr & Mrs Elias T.Lotha, Transport Commissioner

12. Roben Mesen, Regional Transport Officer, Mokokchung

13. Er & Mrs(Dr.) Aowati Kichu, New Delhi

14. Imkong L Imchen, MLA

15. Mrs. Imtjungla Longchar, DBC, Dimapur

16. Taketchujung Tebu Semchirtem, Khensa

17. OCYA, Mokokchung

18. Youth Ministry, YBA, Mokokchung

Loving Family Members and Relatives

AR-i Phesama Village Council nem teyari agütsü

Dimapur, Metsüremi/March 12, 2021 (TYO): Yimtsüng Kohima Battalion indang Assam aser lokti maneni ajungkettsütsü Rifles dang pelaba metetdaksü. nükjidong nung, HQ IGAR Kasa mapang, village (North) kübok Kohima chairman-ia Assam Rifles dang Battalion indang Assam Rifles- pelaba metetdaksüogo. i Mongolbarnü (09.03.2021) Maneni, HQ IGAR (North) Phesama Village Council, kübok Dimapur Battalion indang Kohima District, Nagaland Assam Rifles-i Tetso College, atema Military Civic Action Dimapur District, Nagaland project ka ayongzüksü. nung NCC Cadets atema

Iba sentong nung osettem prangbong injang sayuba den talisa Desktops, Printer, Laptop aser Photocopy Machine tem agiogo.

Phesama Village Council nem Iba sentong nung, AR team-agütsü. Southern Angami i Armed Forces indang constituency nungi MLA, prangbong injang tasen balala Medo Yokha tongti Cadets tem dang sayu aser ibaji tesemdanger ama iba sentong ajanga Cadets tem armed nung aden aser pai Village forces nung adentsü asoshi Council nem item oset agütsü. ajungmesoa liasü. Nagaland

Phesama yimtsüng nung nungi NCC Cadets 120 agi nüburtem ajungkettsütsü asoshi prangbong injang sayuba maneni lenmang balala ajanga sentong nung shilem agiogo.

Kohima nung 'Super Six' cricket asayamung tenzükogo



Kohima, Metsüremi/March 12, 2021 (TYO): Hokolbarnü, Ruzuhukhrie Government Higher Secondary School Ground, Kohima nung 1buba Open Super Six cricket asayamung tenzükogo. Iba Super Six asayamung ya United Brothers ajanga ayongzüker, ta sangdong ka ajanga metetdaksü.

Iba asayamung lapoka, asaya ter tashi asaya liasü, kong

X.L Red Cricket Academy, Jagguarnauts, N.V press, MC Aloo, K.O.D.H, B.R.T.F aser Royals nungeri pei pei tata asaya kokogo.

Item asaya nungi asayar tajungtem nem 'man of match' den kulikaket agütsü. Iba asayamung quarter final, semi final aser final ya March 14 anepdang 8:00 ako nungi tenzuka asayatsü. Takok angur team nem senpet sen 10,000

aser runners up nem senpet sen 5,000 agütsütsü terenemba lir.

Maneni, Super Six ayonger telok - United Brothers-i iba asayamung aruagi repringtsü asoshi cricket sapur ajak pelashishia jaoker. Iba den külemi, Medical Department ajanga teyuba SOPs nung anidakba den moapu telungtet/ temüket merüka ayutsü asoshi ajak dang mepishir, ta kasa sangdong ajanga metetdaksü.

Dubai Championship nung Roger Federer masayatsü

New Delhi, Metsüremi/March 12, 2021 (Agencies): Brehostibarnü, Qatar Open tebur kija asaya quarter-final nung tamakok anguba sülen Dubai nung aruya aliba ATP 500 asayamung nungi tebur tennis asayar rongnung world no. 6 Roger Federer tukuogo. Küm ka dak tema tennis asayamung ka nung danga shilem magii arur Qatar Open nung Swiss nunger Federer-i mezüing asaya liasü.

20 ben tashi Grand Slam takok angusang, Federer, shiba taoba küm temokok anaben tashi operation agiba sülen Tennis asayamung nung tanaben shilem agia liasü, Qatar Open tebur kija Round of 16 nung pai Britain nunger Dan Evans madak 7-6, 3-6, 7-5 agi takok angu, saka quater nung 3-

6, 6-1, 7-5 agi Georgia nunger Nikoloz Basilashvili makok.

"@atptour nung tanaben shilem agitsü maongka anguba asoshi pelar, Doha nung quater asaya tongteta jangratema asayaogo," ta Grand Slam 20ben tashi takok angusang Federer-i ashi.

"Asaya tajungba renemshitsü asoshi training agitsü tebilemba nung, taruba hopta Dubai asayamung nungi tukadoktsü telemtetba agir. Yashi aser tanü ni jangratema asayaogo. Doha-i arua iba Tour nung tanaben shilem agitsü maongka anguba atema pelar," ta Qatar Open nungi tukadoktsü sangdongba sülen Federer-i ashi.

Ano külen, world no. 2 aser Spain nunger Rafa Nadal-a

Dubai asayamung nungi tukuogo. Dubai asayamung ya March 14 nungi 20, 2021 tashi asayatsü.

Federer-i Dubai Open asayamung 8ben tashi takok ngua lir aser 2019 küm pai 100buba tour-level title ajangzükteta liasü. March 22 nungi April 4, 2021 tashi Miami Open title - Masters 1000 asayamung nung pai shilem magitsü telemtetba agiogo.

Taoba ita arishi küm 39 tain Federer-i Australian Open 2021 nung shilem agitsü sentong renemer liasü, saka pai iba Grand Slam masaya aser pai ashiba agi, Wimbledon matongdang pa asaya nung teyari agütsütsü ta asadangtetba asayamung nungang shilem agitsü.

T20I team rankings nung India tanabuba jenjangi tuogo

Dubai, Metsüremi/March 12 (Agencies): Bodhbarnü sayaba ICC T20I Team Rankings nung Virat Kohli-i aniba India team tanabuba jenjangi tuogo. Test team tem rongnungbo India temaba jenjang nung lir aser 50-over format nung tanabuba jenjang nung lir.

New Zealand den T20I series 3-2 agi makokba sülen Aaron Finch-i aniba Australia team tasembuba jenjangi asepzüka luogo aser parnok India dang nungi point ka agi dang tajemba lir.

T20I Team Rankings nung England maneni temaba jenjang nung lir aser parnok India dang nungi point tenet agi timba lir. India aser England na T20I asaya pongu

asayatsü lir anungji team rankings nung jenjang yanglushitsü atema India asoshi maongka lir.

T20I batsmen rankings nung Australia captain Aaron Finch tanabuba jenjangi tuogo. New Zealand den asaya nung kanga junga asayaba sülen pai iba jenjang ajangtetogo. Finch jenjang ana tejakdangi tua tanabuba jenjang atong aser kasa mapang nung KL Rahul jenjang ka asepzüka alua tasembuba nung lir.

Batting rankings nung India team captain Virat Kohli maneni jenjang trokbuba nung lir. Maneni England captain Eoin Morgan-a jenjang 10buba nungi matsüngshi lir.

New Zealand opening batsman Martin Gupthill-a

jenjang asem tejakdangi tua top ten nung tibuba tongtetogo.

T20I bowling aser all-rounder rankings nung India nunger ka danga mali. T20I format nung bowler tem rongnung Rashid Khan maneni temaba jenjang nung lir aser all-rounder tem rongnung Afghanistan nunger asayar Mohammad Nabi temaba jenjang nung lir.

Bowling rankings nung Australia nunger spinner Ashton Agar jenjang pezü tejakdangi tua pa pezübuba nung lir aser Kiwi spinner Ish Sodhi-a jenjang asem tejakdangi tua tibuba nung lir.

Sri Lanka nunger spinner Lakshan Sandakan-a jenjang teku tejakdangi tua 10buba tongtetogo.

'Le Mans' nung Racing Team India-i shilem agitsü

New Delhi, Metsüremi/March 12, 2021 (Agencies): India nunger racer mongin Narain Karthikeyan-i anir Racing Team India-i nüngtugu '24 Hours of Le Mans' nung shilem agitsü.

Le Mans 2021 edition atema 'provisional entry' melaba sülen India nunger driver asem team kati iba race asayamung nung shilem agitsü terenemba lir, koba India nunger racing putiotsü nung mezüing alitsü.

India nunger driver line up nung Narain Karthikeyan, Arjun Maini aser Naveen Rao nunger dena lir aser iba nüngtugu race indang "LMP2-AM" category nung par aseme tokteptsü.

Tawa UAE nung ayonga asayaba 'Asian Le Mans Series' nung India nunger racer asempronglai shilem agia liasü, saka parnoki takok aika mengutet.

"Iba asayamung nung shilem agitsü maongka anguba ya team atema dang masü saka India rangben atema osang tajung ka lir," ta India indang mezüing Formula One driver

Karthikeyan-i ashi.

2021 24 Hours of Le Mans, koba 'Circuit de la Sarthe' nung 89buba race asayamung alitsü, alima ajunga asüngba Covid-19 tenokdangba ajanga taoba mapang ama June nung asayatsü melena iba asayamung August 21 aser 22, 2021 tashi anogo atsülangtsü.

"2009 küm Circuit de la Sarthe semdangba mapang nungi Le Mans nung India team ka anir shilem agitsü asoshi ni mangdang ayu. Onok sponsors aser iba maparen nung külem sendaktepa alir ajak dang pelaba metetdaksür aser iba den külemi ACO aser Asian Le Mans Series team danga alakteta pelaba shisemer, parnok medenra tanü iba maongka ya mengutetla," ta Karthikeyan-i ashi.

Iba race asayamung nung #74 car ya Eurasia Motorsport ajanga achayangtsü. Taoba ita Asian Le Mans Series nung, iba team (Eurasia Motorsport)-i mezüing shilem agia liasü aser parnoki pungobuba jenjang ngua tembang.

Mithali Raj-i alizüing tasen ka tongtet



Lucknow, Metsüremi/March 12, 2021 (Agencies): Hokolbarnü (12.03.2021) India tsür cricket asayar Mithali Raj-i International Cricket format ajunga nung run 10,000 yangluteta alizüing tasen ka tongtet. Iba alizüing tongteter India tetsür cricket asayar rongnung Raj mezüing kümogo.

Iba anogo Lucknow nung India aser South Africa na tsüngda One-day International (ODI) series asaya aliba tasembuba asaya mapang Mithali-i iba alizüing tongteta liasü.

Tasembuba ODI asaya mapang, India tetsür team ODI skipper Mithali ya South Africa tetsür team nungi bowler Anne Bosch-i out mesütsüdang, lai run 36 yanglua liasü.

ODI career format ajunga nung Mithali-i ODIs run 6974 aser T20Is nung lai run 2,364 yanglua lir. Arishi küm 38 tain right-hand batter, Mithali-isa Test asaya 10 nungi run 663 yanglua lir.

ODI format ajunga nung run 10,000 yangluteter international cricket asayar (tetsür) rongnung Mithali tanabuba alitsü.

Tetsür Cricket asayar rongnung iba alizüing mezüing tongteter rongnung England tsür Charlotte Edwards mezüing lir.

Board of Control for Cricket in India (BCCI)-ia takok tajung angur Mithali nem tenüingsang agütsüogo.

1999 küm Mithali-i international cricket wadang nung ajemoka lai India tetsür team tenüing nungi Ireland den mezüing asayaogo.

Over 50 format nung, Mithali-i ODIs 212 asayaogo aser century 7 den half century 54 yangluogo.

Mithali, shibai India tenüing nungi T20Is 89 asaya lir, 2019 küm September ita lai iba T20Is format nungi anenba sangdongogo.

T20Is asaya nunga Mithali-i 17 ben tashi half-century yanglu aser asaya ka nungbo lai run 97 (not out) yanglua lir.

India nunger batsman takotet aser asayar tejen Sachin Tendulkar aser taoba mapang India nunger opener Wasim Jaffer nati Twitter sabang ajanga Mithali Raj nem tenüingsang agütsüogo.

BILEMDANGANG

"Aritepa sentong yanglurbo aiben takok mangur."